



Ioachimus ex honesta familia apud S. Gallenses in Heluetia natus est. Is cum prima literarum fundamenta in patria iecisset, sese studiorum amore Vuiennam Austriae contulit, atque ibidem omnis generis artes & scientias didicit, anno circiter 1510. In primis uero Poeticae & oratoriae incubuit, atque Medicinae facultate ijs scientijs coniunxit. id quod tum feliciora ingenia in frequenti usu habuere. Itaque factum ut Medicinae Doctor publice creatus fuerit. Postea animum ad scribendum appulit, & multa carmine & prosa conscripsit. inter quae etiam Epitome trium terrae partium Asiae, Africae, & Europae extat. Inde Ioachimus cum Vuienensem Academiam plurimum sua eruditione decorasset, in Heluetiam rediit, atque patriae inseruire proposuit, idque eo tempore cum Lutherus in Saxonia, & Zuinglius in Heluetia pontificis Romani errores manifestarent. Itaque Ioachimus magna diligentia Theologiae operam dedit, & res controuersas summa industria inter se contulit. Cum etiam rei ueritatem cognouisset, Catholicos (quos uocant) reliquit, & Euangelicis accessit. Inde de Sacramentis opus conscripsit, & studium Medicum & Theologicum magna dexteritate coniunxit.